

दिनांक 22.06.2025

समय: 18.45 बजे

आकाशवाणी जयपुर-अजमेर
प्रादेशिक समाचार

- कृषि मंत्री डॉ. किरोड़ी लाल मीणा कयो-खाद-बीज मांय मिलावट अर इण री काळाबाजारी बर्दाश्त नी करी जाएला।
- वंदे गंगा, जल संरक्षण-जन अभियान मांय अढाई करोड़ लोगां री भागीदारी री-42 हजार ऊं बत्ती जल स्त्रोतां री सफाई करीजी।
- एन.आई.ए. पहलगाम हमला मांय भेळा आतंकियां ने शरण देवण रा इल्जाम मांय कश्मीर ऊं दो लोगां ने गिरफ्तार कर्या।
- प्रदेश रा घणकरा हलकां मांय मॉनसूनी बिरखा पूगी- माउट आबू मांय सब ऊं बत्ती 19 सेंटीमीटर पाणी बरस्यो।

कृषि मंत्री डॉ. किरोड़ी लाल मीणा री अगुवाई मांय आज श्रीगंगानगर रा सूरतगढ मांय खाद-बीज रा गोदाम माथे छापो मारी ज्यो। अठे ऊं डीएपी अर दूजा खाद रा कोई 32 हजार कट्टा बरामद करी ज्यो। आं री कीमत कोई 50 करोड़ रिप्या बताई ज्यो है। ओ खाद काश्तकारां ने बांट्यो जावणो हो। मीडिया ऊं बतळ मांय कृषि मंत्री कह्यो के खाद-बीज री काळाबाजारी ने लेर गैर-कानूनी जमाखोरी करीजी ही।

कृषि मंत्री कयो के राज्य मांय नकली अर मिलावटी कृषि उत्पादां री बिकवाळी माथे करड़ी कार्यवाही करी जाएला। इण पैला लारली रात श्री मीणा बीकानेर मांय कैमिकल अर खाद रा गोदामां माथे कार्यवाही करी। ई दौरान बीछवाल औद्योगिक हलका अर अनाज मण्डी मांय करीजी ई छापामारी मांय घटिया किस्म रा साढे चार सौ क्विंटल ऊं बत्ती बायोस्टिमुलेंट अर पेस्टीसाइड रा भंडार पकड़ी ज्यो।

उठी ने भीलवाड़ा रा हमीरगढ हलका रा ओजियाड़ गांव मांय ई खाद फैक्ट्री माथे छापो मारी ज्यो। अठै गडबड़ी मिलण माथे 300 मीट्रिक टन खाद री बिकवाळी माथे रोक लगा दीरीजी है। ध्यान जोग है के कृषि मंत्री लारला 20 दिनां मांय पांच जिलां मांय छापामारी कर चुक्या है। इण रे अलावा खेती महकमा रा 11 अहलकारां ने आं गडबडियां रा आरोप मांय सस्पेंड ई कर्या जा चुक्या है।

केन्द्रीय कृषि राज्यमंत्री भागीरथ चौधरी आज कोटा रा दौरा माथे है। वणा जाखोड़ा मांय जैविक कृषि अनुसंधान अर प्रशिक्षण केन्द्र रो जायजो लियो। ई दौरान श्री चौधरी जैविक खेती करण वाळा काश्तकारां ऊं बतळ ई करी। वणा जैविक खेती ने दूजी विधियां ऊं सस्ती अर अनूठी बतावता नुवी पीढ़ी ने ई इण ऊं जोड़ण माथे ज़ोर दियो। केन्द्रीय मंत्री काश्तकारां री मेहनत अर करड़ी कोशिशों री सराहवणा करी।

संसदीय कार्य मंत्री जोगाराम पटेल आज जोधपुर मांय सड़क बणावण रा काम री नींव धरी। आ सड़क कुड़ी भगतासणी ऊं रामेश्वर नगर ताई कोई पौने दो करोड़ रिप्या री लागत ऊं बणायी जाएला। श्री पटले आज ई

जोधपुर मांय जणसुनवाई करी। वणा संवेदनशीलता अर गंभीरता रे साथे परिवादां ने सुण्या अर वां ऊं जुड़या अहलकारां ने वाजिब कार्यवाही रा निर्देश दिया। ई दौरान श्री पटेल कयो के जणसुनवाई महज एक कार्यक्रम नी है बल्कि ओ सरकार अर जनता री बीचे पुळ रो काम करे है।

जयपुर रा राष्ट्रीय आयुर्वेद संस्थान मांय आज पाण्डुलिपि लिप्यंत्रणा प्रशिक्षण कार्यशाला आयोजित करीजी। राष्ट्रीय पाण्डुलिपि मिशन कानी ऊं ज्ञान भारतम मुद्दा माथे व्ही ई 15 दिन री कार्यशाला मांय शास्त्रीय ग्रंथां ने बचावण रा बारा मांय चर्चा करीजी। केन्द्रीय संस्कृति मंत्री गजेन्द्र सिंह शेखावत आज इण मांय शिरकत करी। ई मौके वणा कयो के भारत री सभ्यता संस्कृति अर बौद्धिक सम्पदा ई इण री असली ताकत है। श्री शेखावत कयो के आपा ने भारतीय शास्त्रीय ज्ञान री अणमोल धरोहर ने बचार आगली पीढ़ी ताई पूगावणी चाहिजे।

अलवर रा रामगढ मांय आज मुफ्त चिकित्सा शिविर लगायी ज्यो। केन्द्रीय मंत्री भूपेन्द्र यादव अर उपमुख्यमंत्री डॉ. प्रेमचंद बैरवा इण री सरुआत करी। ई दौरान वणा केन्द्र अर राज्य सरकार कानी ऊं चलायी जाए री स्वास्थ्य योजनावां रा बारा मांय ई बतायो।

वंदे गंगा, जल संरक्षण—जन अभियान रे तैत प्रदेश मांय जल संरक्षण अर संचयन रा हलका मांय नुवा कीर्तिमान रच्या है। 5 जून ऊं 20 जून ताई चाल्या ई अभियान रे दौरान 3 लाख 70 हजार ऊं बत्ती कार्यक्रम व्हा। आं मांय कोई अढाई करोड़ रेहवासियां हिस्सो लियो। महिलावां ई बढ-चढने भागीदारी करी। प्रभात फेरियां, कलश जातरावां, जलाभिषेक, चौपाळ अर श्रमदान री मार्फत लोगां ने पाणी सहेजण अर बचावण रो संदेश दीरी ज्यो। ई दौरान 42 हजार ऊं बत्ती पाणी रा स्त्रोतां री साफ-सफाई करीजी। प्रदेशभर मांय दफतरां, अस्पतालां अर शिक्षण संस्थानां मांय ई स्वच्छता रा कार्यक्रम व्हीया।

राष्ट्रीय अन्वेषण अभिकरण—एन.आई.ए. पहलगाम हमला मांय भेळा आतंकियां ने शरण देवण रा आरोप मांय दो लोगां ने गिरफ्तार कर्या है। एनआईए बतायो के बटकोट रेहवासी परवेज अहमद जोथर अर पहलगाम रा हिल पार्क मांय रेहवण वाळा बशीर अहमद जोथर ने पकड़या है। अ हमला मांय भेळा तीन हथियारबंद आतंकियां री पिछाण उजागर करी है। एजेंसी बतायो के सगळा आतंकी पाकिस्तानी रेहवासी हा अर आतंकी गुट लश्कर—ए—तैयबा ऊं जुड़या हा। एनआईए रे मुजब आं लोगां जाणबूझने तीन्यू आतंकवादियां ने हमला ऊ पैला हिल पार्क मांय शरण दी ही।

झालावाड रा सैनिक पवन प्रजापति रो आज वां रा निजू गांव खेरखेड़ा मांय फौजी सन्मान रे साथे अंतिम संस्कार कर दीरीज्यो। ई दौरान तिरंगा यात्रा निकाळी ज्यी अर आखो वातावरण देशभक्ति रा नारां ऊं गूंज ग्यो। घणी तादाद मांय लोगां वां ने नम आंख्यां ऊं विदाई दी। पवन असम मांय तैनात हा अर एक हादसा रा शिकार व्हे गया हा।

प्रदेश रा घणकरां हलकां ताई मॉनसूनी बिरखा पूग ग्यी है। मौसम महकमो आज राज्य रा अगुणी हलका मांय हळका ऊं मझला दर्जा री अर कोटा, उदयपुर अर भरतपुर संभाग मांय कठे—ई—कठे भारी बिरखा री आस जताई है। अगुणी राजस्थान मांय आवता दो दिनां मांय भारी बिरखा री गतिविधियां मांय बढवार रा आसार है। वठे ई काले कोटा, भरतपुर अर जयपुर संभाग मांय एक—दो ठोड़ां घणी भारी बिरखा होवण री आस है। लारला चौबीस घंटा मांय माउंटआबू मांय सब ऊं बत्ती 19 सेंटीमीटर पाणी बरस्यो। वठे ई भीलवाडा, चित्तौडगढ, राजसमंद,

टोंक अर झालावाड मांय तेज बिरखा व्ही। ई बीचे आज राजधानी जयपुर समेत न्यारी-न्यारी ठोडां चोखी बिरखा व्ही। पाली मांय कदे ई तेज तो कदे ई मझली बिरखा रो दौर चाल्यो। श्रीगंगानगर जिला रा पदमपुर, रत्तेवाला, मुकलावा अर जिला मांय केई ठोडां हळकी बिरखा व्ही। सवाईमाधोपुर मांय ई रिमझिम बिरखा ऊं मौसम सुहावणो बण्योडो है। म्हाणा बांसवाडा खबरनवीस बतायो के जिला मांय केई ठोडां व्हेरी बिरखा ऊं मौसम मांय ठण्डक घुळ ग्यी है। दीतवार होवण रे कारण आज सैर-सपाटा री ठोडां चोखी रौनक निजर आई।

हनुमानगढ़ रा कैंचियां मांय आज मिलावटी डीजल बणावण रा कारखाना ने पकड़ी ज्या है। रसद महकमा कानी ऊं करीजी ई कार्यवाही मांय 16 हजार लीटर ऊं बत्ती डीजल जव्त करीज्यो। ई फैक्ट्री ऊं लोहा अर प्लास्टिक री केई टंकियां ई बरामद करीजी। इण ऊं पैला काले पल्लू मांय करीजी छापामारी मांय 40 हजार लीटर ऊं बत्ती गैर-कानूनी डीजल पकड़ी ज्यो हो।

“नशा मुक्त पखवाड़ा” रा तैत लोगां ने नशा मुक्ति सारू प्रेरित कर्या जावे। इण रे साथे ही नशीली चीजां ऊं होवण वाळा नुकसाण रा बारा मांय जाग जगाई जावे। 12 जून ऊं सरू व्हीया ई पखवाड़ा मांय **“नशा छोड़ो-जीवन से नाता जोड़ो”** संदेश साथे रैली, शपथग्रहण जळसो अर न्यारी न्यारी गतिविधियां आयोजित करी जाय री है। सामूदायिक स्वास्थ्य केन्द्रां अर स्कूलां मांय नुक्कड नाटकां री मार्फत नशा ऊं दूर रेहवण री सलाह दी जावे।

प्रधानमंत्री नरेन्द्र मोदी आकाशवाणी ऊं 29 जून दीतवार ने प्रसारित कर्या जावण वाळा खास कार्यक्रम मन की बात मांय विचार बतावेला। आ ई रेडियो कार्यक्रम री 123वीं कड़ी व्हेला। आप ई ई सारू मुफ्त नम्बर **1800-11-7800** माथे 27 जून ताई राय भेज सको हो। ई रे अलावा नरेंद्र मोदी एप या माय जीओवी ओपन फोरम रे जरिए ई सुझाव भेज्या जा सके है।
